



Coimisiún na Scrúduithe Stáit

SCRÚDÚ NA hARDTEISTIMÉIREACHTA, 2020

Ealaín - Treoir don Obair Chúrsa

Cumadóireacht Shamhlaíoch **nó** Ábhar Neamhbheo

agus

Ceardaíocht **nó** Dearadh

Ardleibhéal **agus** Gnáthleibhéal

Tá 200 marc ag gabháil le comhpháirt na hoibre cúrsa, i.e. 50% de na marcanna iomlána ar an Ealaín

Ba chóir an treoir seo chomh maith le Leabhar Oibre Obair Chúrsa
Choimisiún na Scrúduithe Stáit a thabhairt d'iarrthóirí ar an

Luan, 6 Eanáir, 2020

Ba chóir 30 uair, ar a laghad, de theagmháil ranga a chur ar fáil chun comhpháirt na hoibre
cúrsa a dhéanamh taobh istigh den tréimhse dhá sheachtain déag

Ní mór an obair ar fad a bheith críochnaithe faoin Aoine, 3 Aibreán, 2020

Treoracha d'iarthóirí

1. Is **ort féin** mar iarthóir atá an fhreagracht as cloí leis na treoracha seo. Má theipeann ort cloí leis na treoracha seo, **ní bheidh** do mhúinteoir Ealaíne in ann d'obair chúrsa a bhailíochtú agus a s(h)íniú a chur léi. Sa chaoi go mbeidh do mhúinteoir Ealaíne in ann do chuid oibre a bhailíochtú, ní mór duit obair chúrsa a roghnú is féidir a chur í gcrích laistigh den am faoi mhaoir seacht atá ar fail ar scoil agus í a dhéanamh leis na hábhair agus leis an trealamh atá ar fáil sa scoil.
2. Ní mór do do chomhpháirt den obair chúrsa na riachtanais atá sonraithe sa Threoir don Obair Chúrsa a chomhlíonadh.
3. Ní mór d'obair chúrsa a chríochnú faoin dáta atá luaite sa Threoir don Obair Chúrsa Ealaíne Ardteistiméireachta.
4. Is den riachtanas é go mbeadh **dhá** shaothar curtha i gcrích san obair chúrsa chríochnaithe a chuireann tú isteach le haghaidh measúnaithe **agus** ní mór a bhforbairt bheith taifeadta sa Leabhar Oibre na hOibre Cúrsa. Ní mór an fiosrú agus an fhorbairt, a rinne tú ar do rogha téama, a thaifeadadh i do leabhar oibre.
5. **Ní mór duit** bheith ag obair go díreach isteach sa Leabhar Oibre na hOibre Cúrsa. Ba chóir d'fhiosruithe amhairc, do smaointe agus do thurgnaimh go léir bheith léirithe ar leathanaigh do leabhair oibre; ba chóir go mbeadh cuntas ann ar an turas a rinne tú ón chéad smaoinemh go dtí gur cuireadh i gcrích é.
6. **Ní cóir** do leabhar oibre ná do shaothair chríochnaithe a thabhairt amach as an scoil ar chúinse ar bith nó má thugtar measfar d'obair chúrsa a bheith neamhbhailí agus ní bhronnfar aon mharcanna ort.
7. Is den riachtanas é gurb é do chuid oibre **bunúsai féin** a bhéas san obair chúrsa a chuireann tú isteach le haghaidh measúnaithe. Ní ghlactar le hobair ghrúpa le haghaidh measúnachta.
8. Ba choir go mbeadh taifead i do leabhar oibre de phróiseas an dearaidh agus na forbartha agus ba chóir go léireodh sé na **céimeanna** a thug tú chun do chuid oibre **a fhorbairt** agus a chur i gcrích. Ba cheart duit freisin moladh faoi choinne do dhá shaothar chríochnaithe a dhéanamh chomh maith.
9. **Ní mór duit foinsí príomha a úsáid.** Is é atá i gceist le foinsí príomha nó foinsí fisiceacha nó coincheapúla a bhreathnaítear ina mbunchruth agus nach gcuirtear in iúl trí idirmhíniú duine eile. Tá cead agat meascán d'fhoinsí fisiceacha agus d'fhoinsí coincheapúla a úsáid (agus tú ag obair ó do shamhlaíocht, ó chuimhne nó ó do mhothúcháin).
10. Más mian leat foinsí tánaisteacha a úsáid níor chóir duit iad a úsáid ach amháin mar thionchar nó mar inspioráid agus ba chóir duit iad a chur ar an mBileog an Taighde Tosaigh. Ní mór cúis a bheith agat le foinsí tánaisteacha a chur san áireamh: le féachaint conas a úsáideann daoine eile ábhair, teicnící, dromchlaí, gnéithe den ealaín nó den chumadóireacht. Ní mór duit aitheantas a thabhairt d'aon fhoinsí tánaisteacha agus na sonraí tagartha iomlána a thabhairt.
11. Má dhéantar ábhar (foinsí tánaisteacha) a chóipeáil go díreach ón ngréasán domhanda nó ó fhoinsí eile, agus má chuirtear i láthair mar do chuid oibre féin é, ní bhronnfar aon mharcanna ort as an obair sin.

12. Staidéar a dhéanamh lasmuigh den seomra ranga: is ceadmhach roinnt sceitsí a dhéanamh agus roinnt grianghraf a thabhairt isteach sa rang ach is sa rang Ealaíne faoi mhaoirseacht do mhúinteora Ealaíne ba chóir an fhorbairt a dhéanamh. Ba chóir do na staidéir nó don grianghrafadóireacht a taifeadadh lasmuigh de ranganna faoi mhaoirseacht a bheith ar Bhileog Forbartha 1 **amháin**. Ba choir a laghad a dhéanamh lasmuigh den seomra ranga agus is féidir. Ní mór do do mhúinteoir Ealaíne an obair a dhéantar lasmuigh den seomra ranga a bhailíochtú mar do chuid oibre féin sula gcuirtear isteach mar obair chúrsa í. Ní mór an obair a thugann tú isteach sa scoil a bheith ar an leibhéal céanna agus den chaighdeán céanna leis an obair a dhéanann tú faoi mhaoirseacht an mhúinteora Ealaíne.
13. Féadhfaidh samplaí d’obair thrialach a rinne tú féin sa seomra ealaíne le linn thréimhse an tionscadail a chur isteach i do leabhar oibre, ar nós greamanna bróidnéireachta ar fhabraic, meascán dathanna, trialacha uigeachta, trialacha ar chúldathanna éagsúla, do ghrianghraif agus nótaí scríofa féin. Ba chóir go mbeadh na samplaí (cúldathanna agus obair thrialach, etc.) a ghreamaíonn tú isteach beag go leor go mbeidh dóthain spáis agat le bunús na hoibre a dhéanamh go díreach ar an leabhar oibre.
14. Ní mór duit do scrúduimhir a chur ar an leabhar oibre na hoibre cúrsa agus ar do shaothair chríochnaithe ach úsáid a bhaint as na lipéid atá curtha ar fáil.
15. Le go mbeidh do mhúinteoir Ealaíne in ann d’obair chúrsa a bhailíochtú agus chun a chinntiú go mbeidh na coinníollacha céanna i bhfeidhm i gcás na hiarrthóirí go léir, ní mór an leabhar oibre na hoibre cúrsa agus na saothair chríochnaithe a dhéanamh ina n-iomláine sa scoil faoi mhaoirseacht an mhúinteora ranga.
16. Beidh ar do mhúinteoir Ealaíne agus ar Phríomhoide do scoile cáipéis a shíniú le dearbhú gur lean tú na treoracha seo. Bailíochtaítear do chuid oibre leis sin. Ní mór dóibh Coimisiún na Scrúduithe Stáit a chur ar an eolas murar lean tú na treoracha go léir.
17. Fiú má dhéanann an scoil an obair a fhíordheimhniú, má bhítear in amhras faoi chóipeáil, faoi chúnamh míchuí ó pháirtí eile, faoi bhraidaíl nó go bhfuarthas obair ó pháirtí eile, déanfar sin a fhiosrú go mionchúiseach. Áit nach féidir le Coimisiún na Scrúduithe Stáit obair chúrsa a dhearbhu mar obair aonair an iarrthóra é/í féin, déileálfaidh Coimisiún na Scrúduithe Stáit leis go hiomchuí. Is minic a tharlaíonn dá thoradh sin go meastar an obair a chuirtear i láthair a bheith neamhbhailí agus ní áirítear na marcanna a bhronntar as obair dá leithéid nuair a bhíonn an toradh foriomlán a ríomh.
18. Is **orts** mar iarrthóir atá an fhreagracht as cloí le riachtanais an scrúdaithe. Mura sásaítear na riachtanais thuas, ní bheidh aon rogha ag do mhúinteoir Ealaíne ná ag údaráis na scoile ach sin a chur in iúl do Choimisiún na Scrúduithe Stáit.

Nóta: tá na cúinsí inar féidir leis an Aire Oideachais agus Scileanna marcanna iarrthóra a choinneáil siar leagtha síos i “Rialacha agus Clár na Meánscoileanna”. Is féidir aon duine a chabhraíonn le h-iarrthóir rialacha scrúduithe a bhriseadh, a ionchúiseamh faoin Acht Oideachais 1998.

Obair Chúrsa: Treoracha

Réamhrá

- Roghnaigh **ceann amháin** de na téamaí thíos agus bunaigh d’obair chúrsa ar an téama seo:
 - Tairseach
 - Dinimiciúil
 - Meas.
- Tá cead agat, más mian leat, an t-ábhar tacaíochta atá molta faoi gach ceann de na téamaí thíos a úsáid. Cuireann an t-ábhar tacaíochta seo in iúl réimsí féideartha fiosraithe taobh istigh den téama a bhféadfá spéis a chur iontu. Mar sin féin, níl iontu sin ach moltaí agus tá a lán cur chuige eile a d’fheadfá a úsáid agus atá gach pìoc chomh baileach leo siúd.
- Roghnaigh do chur chuige **féin** agus cruthaigh do chuid oibre **féin** bunaithe ar **do** rogha téama.

Téama A	Téama B	Téama C
Tairseach	Dinimiciúil	Meas
<i>Ábhar Tacaíochta</i>	<i>Ábhar Tacaíochta</i>	<i>Ábhar Tacaíochta</i>
Doras, geata nó bealach isteach eile, go speisialta ceann mór agus maorga.	Ag léiriú táirgiúlacht, dul chun cinn nó athrú leanúnach.	Ard-urraim ar rud éigin nó ar dhuine éigin.
Pasáistí, póirseáidí, cróite, súile, fuinneoga, doirse, geataí, eochracha, glais, boscaí litreacha, feanléasacha, cuimhneacháin, séadchomharthaí laistigh, lasmuigh, uaicaisí, tolláin, teorainneacha, imeallchríocha, modhanna iompair, poill phéiste, vardrúis draíochta, turais, tosaigh, gairm bheatha, slí bheatha.	Beomhar, fuinniúil, cumhachtach, nádúr, aimsir, séasúir, ceol, uirlisí, torann, pearsantachtaí, caidrimh, leictreachas, maignéid, gaibhniú, innealtóireacht, innealra, eolaíocht, sláinte, spóirt, cultúr, na healaíona, cor sa phlota, faisean, treochtaí, bheith in airde láin, scartáil, athnuachan.	Mé féin, mo chéannacht, mise, ainm maith, muinín, cairdeas, pobal, clann, airgead, sábháilteacht, oideachas, scil, timpeallacht, duaiseanna, taiscí, seandachtaí, sladmhargaí, féiríní cuimhneacháin, cuimhní, buataisí féile, seanéadaí linbh, seanbhréagáin, siopaí carthannachta, clóis dramh-mhiotail.
Johannes Vermeer An tSráidín 1658	Cornelia Parker Damhna Dorcha Fuar: Scar-Amharc 1991	Mary Cassatt Folcadán an Linbh 1893

Forbairt

Ní mór duit struchtúr dualgais Leabhar Oibre na hOibre Cúrsa a leanúint:

1. **Bileog an Taighde Tosaigh** – taighde le haghaidh d’oibre cúrsa ar fad.
 - Déan taighde agus imscrúdú ar do rogha téama, taispeánfaidh an t-imscrúdú seo féidearthachtaí agus bealaí a d’fhéadfá leanúint le d’obair chúrsa.
2. **Bileoga Forbartha 1 & 2 do Roinn A agus Roinn B.**
 - Forbair smaointe ó do chuid taighde is imscrúdaithe agus úsáid á baint agat as an (na) (bh)foinse(i) príomha atá roghnaithe agat.
 - Fairsingigh agus déan tástáil ar na smaointe seo i slite éagsúla: amharc, anótáilte, meáimheasctha, grianghrafach, etc.
 - Nuair a bheidh tú sásta go bhfuil d’imscrúdú agus d’fhorbairt tar éis moltaí indéanta do Roinn **A** agus **B** a chur ar fáil, déan do mholtaí a sceitseáil ar an mBileog Forbartha ábhartha 2 (**A** nó **B**) agus gabh ar aghaidh agus déan do dhá shaothar chríochnaithe.

Tá an próiseas taighde, imscrúdaithe agus forbartha riachtanach ionas go mbeidh tú ábalta an saothar ealaíne is fearr is féidir leat a chruthú.

- Ní mór duit ábhar ó fhoinse príomha bunaithe ar an téama atá roghnaithe agat a úsáid.
- Ba chóir duit oibriú go díreach ar do Leabhar Oibre na hOibre Cúrsa ag baint úsáide as dhá thaobh na mbileog taighde agus forbartha.
- Ba chóir duit do smaointe a phlé le do mhúinteoir Ealaíne de réir mar a théann d’obair chúrsa ar aghaidh. Ach mar sin féin, ba chóir gurb é **do chuid oibre féin** gan chúnaimh ó aon duine an obair ar fad a chuireann tú isteach.
- Roghnaigh obair chúrsa is féidir a chríochnú taobh istigh den am maoirsithe atá ceadaithe. Baintear úsáid as ábhair agus as fearas atá ar fáil sa scoil.
- Is féidir ábhair thaifeadta ó fhoinsí mar rudaí, daoine agus tírdhreacha a áireamh san imscrúdú agus san fhorbairt. Tá foinsí coincheapúla atá bunaithe ar smaointe agus ar shamhlaíocht ceadaithe freisin. Is ceadmhach teaglamaí foinsí a úsáid chomh maith. D’ainneoin na foinsí a imscrúdaíonn tú, ní mór duit an t-ábhar a ghineann tú ón imscrúdú seo a úsáid chun **do chuid oibre bunúsáí féin** a fhorbairt.

Ní mór duit an obair chúrsa seo a leanas a chur isteach le haghaidh scrúdaithe:

1. Leabhar Oibre na hOibre Cúrsa an Choimisiún na Scrúduithe Stáit comhlánaithe.
2. Saothar críochnaithe do Roinn **A** (Cumadóireacht Shamhlaíoch nó Ábhar Neamhbheo) mar atá rianaithe sa cheist atá roghnaithe agat.
3. Saothar críochnaithe do Roinn **B** (Ceardaíocht nó Dearadh) mar atá rianaithe sa cheist atá roghnaithe agat.
4. Ráiteas Réasúnaíochta do gach roinn.

Tabhair do d'aire é seo a leanas:

- Ba chóir duit do chuid ama a eagrú go cúramach agus do chuid oibre a bhainistiú ó chéim an chéad taighde, trí chéim na forbartha, go dtí cur i gcrích na saothar críochnaithe
- Ionas go mbeidh tú ábalta do chuid oibre a chur sna clúdaigh atá curtha ar fáil ag Coimisiún na Scrúduithe Stáit ar an dáta luaite, ní mór do na hábhair a úsáideann tú bheith sách tirim, etc. ag deireadh thréimhse na hoibre cúrsa
- Níor chóir ábhair mheatacha a úsáid le haghaidh do chuid oibre agus ba chóir dóibh bheith sách láidir le deimhniú go mbeidh do chuid oibre slán le haghaidh phróiseas na marcála agus achomhairc.

Roinn A

Roghnaigh **ceann amháin** díobh seo a leanas:

1. Déan **Cumadóireacht Shamhlaíoch** atá forbartha ón téama a roghnaigh tú. Is féidir le do shaothar bheith macasamhlach agus / nó teibí.

nó

2. Déan saothar **Neamhbheo** bunaithe ar ghrúpa rudaí a mholann do théama roghnaithe.

Tabhair do d'aire é seo a leanas:

- Ní mór duit an struchtúr atá i do leabhar oibre a úsáid chun forbairt a dhéanamh ar do shaothar críochnaithe do Roinn A
- Ba chóir an réasúnaíocht a bhaineann le do shaothar críochnaithe a lua ar leathanach cúil an leabhair oibre, agus ba chóir duit cur síos **i d'fhocail féin** ar an mbaint atá ag do smaoineamh leis an téama atá roghnaithe agat
- Scríobh d'uimhir scrúdaithe, leibhéal agus an teideal 'Cumadóireacht Shamhlaíoch' nó 'Ábhar Neamhbheo' ar chúl do shaothair chríochnaithe
- Tá cead agat oibriú le dath(anna), monacróm, meáin mheasctha, colláis nó meán oiriúnach ar bith eile
- Íosmhéid an tsaothair chríochnaithe: A3. Uasmhéid an tsaothair chríochnaithe: A2.

Roinn B

Roghnaigh **ceann amháin** díobh seo a leanas:

1. Dear agus déan píosa **Ceardaíochta** bunaithe ar **cheann amháin** de na ceisteanna Ceardaíochta atá liostaithe.

nó

2. Cruthaigh **Dearadh** bunaithe ar **cheann amháin** de na ceisteanna Dearaidh atá liostaithe.

Tabhair do d'aire é seo a leanas:

- Ní mór duit an struchtúr atá i do leabhar oibre a úsáid chun an saothar críochnaithe do Roinn B a fhorbairt
- Ba chóir an réasúnaíocht a bhaineann le do shaothar críochnaithe a lua ar leathanach cúil an leabhair oibre, ag cur síos **i d'fhocail féin** ar an mbaint atá ag do smaoineamh leis an téama atá roghnaithe agat
- Scríobh d'uimhir scrúdaithe agus leibhéal ar chúl do shaothair chríochnaithe má tá do chuid oibre déthoiseach (2T)
- Más ceardaíocht tríthoiseach (3T) a dhéanann tú, greamaigh ceann de na lipéid atá curtha ar fáil go daingean di agus scríobh d'uimhir scrúdaithe agus leibhéal air
- Scríobh uimhir na Ceardaíochta **nó** Dearaidh a roghnaigh tú faoi d'uimhir scrúdaithe agus leibhéal.

Ceardaíocht

Ní mór duit píosa ceardaíochta a dhearadh agus a dhéanamh bunaithe ar an téama atá roghnaithe agat.

Roghnaigh **ceann amháin** de na ceisteanna seo a leanas:

Ceist 1	Leabharcheardaíocht
Ceardaíocht	Dear agus déan ceann amháin díobh seo a leanas bunaithe ar do rogha téama: <ul style="list-style-type: none">• fillteán scríbhneoireachta• gabhdán pas• comhad bosca.
Treoracha	Ba chóir go bhfeidhmeodh do phársa críochnaithe ceardaíochta agus ba chóir go mbeadh meicníocht dúnta air. Ba chóir go gcuirfeadh a chruth do théama roghnaithe in iúl.
Ábhair	Éagsúlacht páipéar, cárta, ábhair cheangail, naisc, péinteanna, dúigh, ábhair cholláise, greamachán agus uirlisí cuí, etc.
Méid	An tUasmhéid: 40cm ar an toise is mó.

Ceist 2	Peannaireacht
Ceardaíocht	Dear agus déan píosa peannaireachta comhaimseartha nó traidisiúnta bunaithe ar an téama a roghnaigh tú. Roghnaigh ceann amháin díobh seo a leanas: <ul style="list-style-type: none">• liricí amhrán• giota téacs.
Treoracha	Dear agus déan píosa peannaireachta bunaithe ar 4 líne ar a laghad, de théacs nó ar thart ar 40 focal . Tá cead agat téacs as foinse ar bith a roghnú ach ní mór baint a bheith aige le do théama. Tá cead agat cur chuige traidisiúnta agus/nó cur chuige nua-aimseartha peannaireachta a úsáid i do chuid oibre. Tá cead agat colláis, meáin mheasctha nó teicníc chuí ar bith eile a úsáid mar chuid den saothar.
Ábhair	Dromchla oiriúnach don obair pheannaireachta, éagsúlacht ábhar do cholláis, dúigh, péinteanna, pinn litreoireachta, scuaba, marcóirí peannaireachta, rialóir, crosbhacairt, etc.
Méid	An tÍosmhéid: A3, an tUasmhéid: A2.

Ceist 3	Póstaer
Ceardaíocht	Dear agus déan ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • póstaer • cárta taispeána.
Treoracha	Ní mór duit litreoireacht a úsáid i do chuid oibre. Is fearr litreoireacht phearsanaithe lámhdhéanta a úsáid agus ba chóir go gcuirfeadh an litreoireacht an topaic in iúl. Is fút féin atá sé cruth agus cineál an chárta taispeána a roghnú. Ba chóir d'iarthóirí Ardleibhéal 20 carachtar (litreacha / uimhreacha) ar a laghad a úsáid.
Ábhair	Rialóir, crosbhacart, páipéir cholláise, cárta, ábhair uigeacha, scuaba, greamachán, dúigh, péinteanna, meán ar bith eile a thriomaíonn go tapa, etc.
Méid	Póstaer; An tíosmhéid: A3, An tUasmhéid: A2. Níor chóir go mbeadh an cárta taispeána níos mó ná 60cm ar an toise is mó.

Ceist 4	Fíodóireacht
Ceardaíocht	Dear agus déan ceann amháin díobh seo bunaithe ar an téama a roghnaigh tú: <ul style="list-style-type: none"> • taipéis bhalla • teicstíl fhite • painéal do mhála faoi choinne ócáide.
Treoracha	Úsáid éagsúlacht ábhar agus teicnící san inneach. Úsáid dath, cruth, uigeachtaí agus patrún chun barr maise a chur ar do shaothar. Is ceadmhach meáin mheasctha a úsáid.
Ábhair	Dlúth a ullmhaíodh roimh ré ar sheol nó ar fhráma, éagsúlacht snátha, olla agus ábhar solúbtha atá oiriúnach don fhíodóireacht.
Méid	An tUasmhéid: A2.

Ceist 5	Blocphriontáil
Ceardaíocht	Dear agus déan blocphrionta amháin bunaithe ar an téama a roghnaigh tú.
Treoracha	Tá cead agat dearadh a dhéanamh do phrionta aondathach nó do phrionta a mbeidh dhá dhath ar a laghad ann. Ba chóir saghsanna éagsúla gearrthacha a úsáid i do shaothar agus tuiscint chuimsitheach a léiriú ar airíonna na líonóilphriontála / blocphriontála.
Ábhair	Píosa(i) líonóile nó blo(i)c (ag brath ar cé acu modh laghdaitheach nó bloc ar leith do gach dath a bheidh á úsáid agat), páipéar rianaithe, páipéar priontála, dúigh phriontála, uirlisí gearrtha agus priontála, etc.
Méid	An tíosmhéid: 15cm x 20cm, An tUasmhéid: A3.

Ceist 6	Puipéadóireacht
Ceardaíocht	Dear agus déan puipéad gléasta bunaithe ar an téama a roghnaigh tú. Roghnaigh ceann amháin díobh seo a leanas: <ul style="list-style-type: none"> • puipéad miotóige • slatphuipéad • puipéad ar éill.
Treoracha	Ba chóir go mbeadh do phuipéad oiriúnach do léirithe iomadúla. Ní mór don iarrthóir na baill choirp, na héadaí agus na hoiriúintí a dhéanamh. Ní ceadmhach baill choirp athchúrsála nó éadaí ó scrúdú eile roimhe seo nó obair ranga a úsáid.
Ábhair	Fabraic, snáth, ábhair uigeacha éagsúla, péinteanna, baill choirp déanta as cúr-rubar, adhmaid, <i>papier maché</i> nó as ábhair chuí eile.
Méid	Níor chóir go mbeadh cabhail do phuipéid chríochnaithe níos mó ná 100 cm ar an toise is mó.

Ceist 7	Scáthlánphriontáil
Ceardaíocht	Dear agus déan scáthlánphrionta amháin bunaithe ar an téama a roghnaigh tú.
Treoracha	Ní mór trí dhath phriontáilte, ar a laghad, a bheith san áireamh i do shaothar críochnaithe. Ní mór forphriontáil a bheith san áireamh i do dhearadh.
Ábhair	Fabraic, páipéar, scáthlín, ábhar stionsail, dúigh phriontála, cuimleoírí, téip chumhdaigh, etc.
Méid	Níor chóir go mbeadh do phrionta críochnaithe níos mó ná 100 cm ar an toise is mó.

Ceist 8	Teicstílí Lámhphriontáilte
Ceardaíocht	Dear agus priontáil athphatrún amháin ar phíosa d'éadach oiriúnach bunaithe ar an téama a roghnaigh tú.
Treoracha	Ní mór trí dhath phriontáilte, ar a laghad, a bheith san áireamh i do shaothar críochnaithe. Ní mór forphriontáil a bheith san áireamh i do dhearadh. Ba chóir duit na féidearthachtaí dearaidh a bhaineann le gluaiseacht, le sreabhadh agus le nascáil a mheas.
Ábhair	Fabraic, ábhar stionsail, bloic, ruaimeanna, dúigh, etc.
Méid	Níor chóir go mbeadh do phrionta críochnaithe níos mó ná 100 cm ar an toise is mó.

Ceist 9	Baitic
Ceardaíocht	Dear agus déan píosa amháin de bhaitic bunaithe ar an téama a roghnaigh tú.
Treoracha	Ní mór do bhaitic a thumadh go hiomlán dhá uair ar a laghad le linn an phróisis. Níor chóir lámhphéinteáil a úsáid ach amháin ar réimsí beaga mionsonraí.
Ábhair	Fabraic oiriúnach do bhaitic, céir, ruaimeanna, <i>tjanting</i> , scuaba, iarann, etc.
Méid	Níor chóir go mbeadh do bhaitic chríochnaithe níos mó ná 100 cm ar an toise is mó.

Ceist 10	Criadóireacht
Ceardaíocht	Déan saothar ceirmeach bunaithe ar an téama a roghnaigh tú. Roghnaigh ceann amháin díobh seo a leanas: <ul style="list-style-type: none"> • soitheach • píosa dealbhóireachta • painéal rilífe.
Treoracha	Ní mór do shaothar a bhácáil agus a mhaisiú le hábhair oiriúnacha mar shleamhnáin, glónraí agus ocsaídí.
Ábhair	Cré, trealamh cuí criadóireachta agus ábhair chuí.
Méid	An tUasmhéid: 40cm ar an toise is mó.

Ceist 11	Bróidnéireacht
Ceardaíocht	Dear agus déan bróidnéireacht bunaithe ar an téama a roghnaigh tú. Roghnaigh ceann amháin díobh seo a leanas: <ul style="list-style-type: none"> • painéal bróidnithe • píosa dealbhóireachta bog tríthoiseach • píosa ealaíne inchaite.
Treoracha	Tá cead ag iarrthóirí cur chuige comhaimsearach agus / nó cur chuige traidisiúnta a ghlacadh i gcás ceardaíocht na bróidnéireachta. Úsáid trí ghreim éagsúla ar a laghad (greamanna láimhe agus/nó greamanna meaisín) agus teicnící éagsúla, e.g. feiltiú, stuáil, obair phaistí, <i>appliqué</i> , etc.
Ábhair	Ábhair éagsúla ar a n-áirítear nithe aimsithe, fabraicí, snáitheanna bróidnéireachta, cnaipí, coirníní, ribíní, seacainí, sreang, <i>papier maché</i> , etc.
Méid	An tUasmhéid: 50cm ar an toise is mó.

Ceist 12	Snoíodóireacht Adhmaid / Snoíodóireacht
Ceardaíocht	Dear agus snoigh ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • saothar sa lántimpeall • saothar i bhfoirm rilífe.
Treoracha	Tá an litreoireacht roghnach. Ba chóir duit na féidearthachtaí dearaidh a bhaineann le solas ag lonradh ar dhromchlaí agus ar phlánaí a chur san áireamh.
Ábhair	Adhmad, plástar nó ábhar oiriúnach ar bith eile, trealamh snoíodóireachta agus bailchríocha cuí.
Méid	An tUasmhéid: 40cm ar an toise is mó.

Ceist 13	Miotalóireacht / Tógáil
Ceardaíocht	Dear agus déan ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • plaic mhaisiúil • píosa de sheodra inchaite • píosa de dhealbhóireacht saorsheasaimh mhiotail.
Treoracha	Tá an litreoireacht roghnach. Má tá struchtúr tríthoiseach (3T) de dhíth is ceadmhach taca/bonn a úsáid.
Ábhair	Ábhair chruanta, miotail do theicnící tógála, trealamh chun do dhearadh a chur i gcrích.
Méid	An tUasmhéid: 40cm ar an toise is mó.

Ceist 14	Múnlóireacht
Ceardaíocht	Dear agus déan ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • píosa dealbhóireachta sa lántimpeall • painéal maisiúil i bhfoirm rilífe • píosa dealbhóireachta i bhfoirm rilífe.
Treoracha	Ba chóir duit na féidearthachtaí dearaidh a bhaineann le solas ag lonradh ar dhromchlaí agus ar phlánaí a chur san áireamh. Níor chóir an saothar a phéinteáil ná a ghlórnú. Is ceadmhach armatúir agus boinn a úsáid. Is ceadmhach do shaothar a mhúnlú as plástár.
Ábhair	Is ceadmhach na múnláí a dhéanamh as cré, as cré a thriomaíonn go tapa, as marla nó as ábhair ar bith eile atá oiriúnach do theicnící múnlóireachta.
Méid	An tUasmhéid: 40cm ar an toise is mó.

Dearadh

Ní mór duit An Moladh Dearaidh Deireanach a chruthú bunaithe ar an téama a roghnaigh tú.

Tabhair do d'aire é seo a leanas:

- Ní mór duit líníocht mhionsonraithe, toisí san áireamh, de do Mholadh Dearaidh Deireanach a dhéanamh. Ba chóir sonraí ábhar, teicnící, próisis déanta agus bhailchríche, óna bhféadfaí do dhearadh a chur i gcrích, bheith sa mholadh sin
- Ba chóir duit eolas ar bith, a mheasann tú a bheith riachtanach chun do Mholadh Dearaidh Deireanach a chur in iúl, a chur san áireamh. Ba chóir tagairt ar leith a dhéanamh do ghnéithe amhairc, feidhmiúla agus ábhartha na ceardaíochta a roghnaigh tú
- Ba chóir an Moladh Dearaidh Deireanach a chur i láthair i bhfoirm chuí chun an cheist a roghnaigh tú a fhreagairt, is ceadmhach gormchló, fréamhshamhail nó dearadh lámhdhéanta rindreáilte a úsáid
- An tÍosmhéid: A3, An tUasmhéid: A2.

Roghnaigh **ceann amháin** de na ceisteanna seo a leanas:

Ceist 1	Litreoireacht agus Peannaireacht
Dearadh	Roghnaigh ceann amháin díobh seo bunaithe ar an téama a roghnaigh tú: <ul style="list-style-type: none">• píosa callagrafaíochta ag léiriú dáin• píosa callagrafaíochta le húsáid ar aghaidh bhiachláir• píosa callagrafaíochta le húsáid mar chúlra maisiúil ag aonach ceardaíochta.
Treoracha	Cruthaigh dearadh do pháosa peannaireachta bunaithe ar íosmhéid de 4 líne téacs nó thart ar 40 focal . Is ceadmhach an téacs a mbaintear úsáid as a roghnú ó fhoinsé ar bith ach ní mór baint a bheith aige le do théama. B'fhearr litreoireacht phearsantaithe lámhdhéanta, rindreáilte. Tá cead agat oibriú de réir scála. Ba chóir duit toisí a thaispeáint agus eolas cuí a thabhairt maidir le do rogha clóghrafaíocht, spásáil agus leagan amach, agus maidir leis an gcaoi a dtáirgfear do dhearadh. Tá cead agat íomhánna, móitífeanna ornáideacha, focail thromchiallacha agus litreoireacht a bheith ann.
Ábhair	Páipéar, pinn, péint, etc., ábhair pheannaireachta agus uirlisí.

Ceist 2	Blocphriontáil
Dearadh	Roghnaigh ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • blocphriontáil le húsáid ar chlúdach leabhair • blocphriontáil le húsáid mar léiriú ar phainéal maisiúil • blocphriontáil le húsáid mar phrionta mínealaíne.
Treoracha	Cruthaigh dearadh do phrionta a léireoidh tuiscint chuimsitheach ar airíonna na lionóilphriontála/blocphriontála, a cuid féidearthachtaí agus a cuid srianta. Ba chóir duit dearadh a dhéanamh do phrionta ar aon dath amháin nó do phrionta a bhfuil dhá dhath ar a laghad ann. Ba chóir go léireodh do dhearadh críochnaithe eolas cuí faoin gcaoi a dtáirgfear do dhearadh, dathdhealuithe (más cuí) san áireamh, agus na saghsanna éagsúla gearrthacha atá le húsáid.
Ábhair	Páipéar, pinn, péint, etc., ábhair bhlocphriontála agus uirlisí.

Ceist 3	Fabraicphriontáil
Dearadh	Dear ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • athphatrún a bheadh oiriúnach do t-léine • patrún leath-thite a bheadh oiriúnach d'fhabraic • patrún leath-thite a bheadh oiriúnach do pháipéar balla.
Treoracha	Ba chóir go mbeadh do dhearadh oiriúnach do bhaitic, do bhlocphriontáil, do scáthlánphriontáil nó do stionsalphriontáil ar fhabraic nó ar ábhar oiriúnach ar bith eile. Ba chóir duit trí dhath ar a laghad a úsáid agus féidearthachtaí dearaidh na forphriontála a chur san áireamh. Tá cead agat oibriú de réir scála agus ba chóir duit toisí a thaispeáint agus eolas cuí a thabhairt faoin gcaoi a dtáirgfear do dhearadh.
Ábhair	Páipéar, pinn, péint, etc., ábhair fhabricphriontála agus uirlisí.

Ceist 4	Bróidnéireacht
Dearadh	Dear ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • painéal bróidnithe faoi choinne chúisín • hata nó ceannbheart bróidnithe • píosa d'ealaín chomhaimseartha inchaite.
Treoracha	Tá cead agat oibriú de réir scála agus ba chóir duit toisí a thaispeáint, agus eolas cuí a thabhairt maidir leis an gcaoi a dtáirgfear do dhearadh. Bíodh eolas san áireamh agat maidir le do rogha ábhar, greamanna, maisiú coirnéach agus teicnící atá le húsáid chun do dhearadh a chur i gcrích.
Ábhair	Páipéar, pinn, péint, etc., ábhair bhróidnéireachta agus uirlisí.

Ceist 5	Fíodóireacht
Dearadh	Dear ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • taipéis bhalla chun eachtra nó ócáid a cheiliúradh • teicstíl fhite a bheadh oiriúnach faoi choinne cóta • fallaing atá fite.
Treoracha	Ba chóir go gcuirfí san áireamh i do dhearadh na féidearthachtaí dearaidh a bhaineann le dathanna agus le huigeacht agus go dtabharfaí eolas faoin bhfí agus faoi na hábhair atá le húsáid. Tá cead agat oibriú de réir scála agus ba chóir go dtaispeánfá toisí agus eolas cuí faoi na teicnící atá le húsáid chun do dhearadh a chur i gcrích.
Ábhair	Páipéar, pinn, péint, etc., ábhair fhíodóireachta agus uirlisí.

Ceist 6	Criadóireacht
Dearadh	Dear ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • bosca airgid • lárphiosa maisiúil nó feidhmiúil le cur ar bhord proinne • foireann de bhabhlaí proinne.
Treoracha	Tá cead agat oibriú de réir scála agus ba chóir go dtaispeánfá toisí agus go dtabharfaí eolas cuí faoi na teicnící atá le húsáid i do dhearadh. Ba chóir go gcuirfí san áireamh i do dhearadh na féidearthachtaí dearaidh a bhaineann le cré, struchtúr, foirm agus uigeacht. Tabhair sonraí faoi na glónraí agus faoin maisiúcháin atá le húsáid.
Ábhair	Páipéar, pinn, péint, etc., ábhair chriadóireachta agus uirlisí.

Ceist 7	Puipéadóireacht
Dearadh	Dear ceann amháin díobh seo bunaithe ar an téama a roghnaigh tú: <ul style="list-style-type: none"> • puipéad miotóige le húsáid i seomra ranga • slatphuipéad le húsáid i bhféile damhsa • puipéad ar mhórscála le húsáid in amharclann.
Treoracha	Tá cead agat oibriú de réir scála agus ba chóir duit toisí a thaispeáint. Léirigh an chaoi a gcuirfear an puipéad le chéile agus an chaoi a bhfeidhmeoidh sé. Tabhair sonraí maidir leis na hábhair atá le húsáid agus maidir leis na teicnící maisiúcháin atá le húsáid chun do dhearadh a chur i gcrích.
Ábhair	Páipéar, pinn, péint, etc., ábhair phuipéadóireachta agus uirlisí.

Ceist 8	Leabharcheardaíocht
Dearadh	Dear ceann amháin díobh seo bunaithe ar an téama a roghnaigh tú: <ul style="list-style-type: none"> • fillteán bosca chun grianghraif a choinneáil ann • comhad infhairsingithe chun giurléidí a choinneáil ann • fillteán faoi choinne oideas.
Treoracha	Tá cead agat oibriú de réir scála. Ba chóir go dtaispeánfaí toisí ar do dhearadh críochnaithe, agus sonraí maidir leis na hábhair, na ceangail/na snaidhmeanna/an fearas dúnta, na híomhánna/an maisiúchán agus/nó an litreoireacht atá oiriúnach don rogha atá déanta agat.
Ábhair	Páipéar, pinn, péint, etc., ábhair leabharcheardaíochta agus uirlisí.

Ceist 9	Dearadh Fógraíochta
Dearadh	Dear ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • clár fógraí do ní is díol spéise do thurasóirí • póstaer le haghaidh féile cheoil • aitheantóir grafach (lógó) do mhusaem.
Treoracha	Ní mór duit litreoireacht a úsáid i do shaothar. B'fhearr litreoireacht phearsantaithe lámhdhéanta, rindreáilte agus ba chóir go léireodh sí an téama a roghnaigh tú. Ba chóir go dtaispeánfaí toisí ar an dearadh críochnaithe agus go dtabharfaí eolas cuí maidir leis na teicnící a úsáidfear chun do dhearadh a chur i gcrích.
Ábhair	Páipéar, pinn, péint, etc., ábhair dhearaidh agus uirlisí.

Ceist 10	Múnlóireacht agus Snoíodóireacht
Dearadh	Dear ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • painéal rilífe do shiopa • píosa dealbhóireachta tríthoiseach saorsheasaimh faoi choinne scoile • painéal maisiúil faoi choinne amharclainne.
Treoracha	Tá cead agat dearadh a dhéanamh don mhúnlóireacht, don tsnoíodóireacht nó do theicníc thógála chuí ar bith. Ba chóir duit oibriú de réir scála, toisí a thaispeáint agus eolas cuí a thabhairt maidir leis na hábhair agus na teicnící a úsáidfear chun do dhearadh a chur i gcrích.
Ábhair	Páipéar, pinn, péint, etc., ábhair mhúnlóireachta agus uirlisí.

Ceist 11	Seit Stáitse
Dearadh	Dear ceann amháin díobh seo a leanas bunaithe ar an téama a roghnaigh tú: <ul style="list-style-type: none"> • seit scannáin do scannán grá • taispeántas do shiopa ealaíne • seit stáitse le haghaidh dráma.
Treoracha	Ba chóir duit oibriú de réir scála, toisí a thaispeáint, agus eolas cuí a thabhairt maidir leis na hábhair agus na teicnící a úsáidfear chun do dhearadh a chur i gcrích.
Ábhair	Páipéar, pinn, péint, etc., cárta, ábhair dhearaidh agus uirlisí.

Níl aon ábhar scrúdaithe ar an leathanach seo

Níl aon ábhar scrúdaithe ar an leathanach seo

Níl aon ábhar scrúdaithe ar an leathanach seo